

Siunnersuummut oqaaseqaatit

## Oqaaseqaatit nalinginnaasut

### 1. Aallaqqasiut

Siunnersuutikkut 2025-mut aningaasanut inatsisip akuersissutigineqarnissaanut killiliussaq 22. november 2024-mut sivitsorneqarpoq. Tamatumalu kingunerisaanik nuna tamakkerlugu akileraarummut aamma nuna tamakkerlugu immikkut akileraarummut procentiliussamik aalajangersaanissamut killiliussat sivitsorneqarput, siunnersummi immikkoortut pingaarcerit aalajangersakkanullu ataasiakkaanut nassuaatit takuuk.

### 2. Siunnersuutip imarisai pingaarcerit

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 15-imni ukioq aningaasanut inatsiseqarfiusoq sioqquullugu kingusinnerpaamik novembarip ulluisa 15-ianni Aningaasanut Inatsit akuersissutigineqartassasoq allaqqavoq.

Aningaasanut inatsisisatut siunnersuutip isumaqtiginniniutigineqarnissaanut piffissaqarnerunissaq pisariaqarpoq. Taamaattumik Naalakkersuisut 2025-mut aningaasanut inatsisip akuerineqarnissaanut killigititap kinguartinneqarnissaa pillugu siunnersummik saqqummiussisasut Aningasaqarnermut Akileraartarnermullu Ataatsimiititaliap qinnuigai.

Tamatumali nassatarisaanik piffissaliussat allat aamma sivitsorneqartariaqarput:

Aningaasarsianit akileraarutit pillugit Inatsisartut inatsisaanni § 61, imm. 2-mi aamma § 64, imm. 2-mi allaqqavoq, nuna tamakkerlugu akileraarutip aamma nuna tamakkerlugu immikkut akileraarutip procentii qaammatisiutini ukioq pineqartoq sioqquullugu 15. november sioqquullugu Inatsisartunit aalajangerneqassasut. Procentit akileraarusiissutit aningaasanut inatsisip ilaatut aalajangerneqartarpuit. Taamaammat siunnersuutaavoq ukioq manna piffissaliussaq, aningaasanut inatsisisap akuersissutigineqarnissaanut piffissaliussaq assigalugu 24. novemberimut sivitsorneqassasoq.

Kommunalbestyrelsit ukiunut aggersunut missingersuutinik akuersinissaannut kommunimullu akileraarutinik aalajangersaanissaanut killigititat siunnersummit kalluarneqanngillat. Tamatumunnga pissutaavoq ulloq 1. decembarip tamatumunnga killigititaanera.

### 3. Pisortanut aningaasatigut allaffissornikkullu sunniutissai

Siunnersuutip pisortanut sunniuteqangaarnissaa naatsorsuutigineqanngilaq.

### 4. Inuussutissarsiortunut il. il. aningaasatigut allaffissornikkullu sunniutissai

Siunnersuut inuussutissarsiutinik ingerlataqartunut aningaasatigut sunniuteqanngilaq.

## **5. Avatangiisinut pinngortitamullu sunniutissai**

Siunnersuut avatangiisinut pinngortitamullu sunniuteqanngilaq.

## **6. Innuttaasunut allaffissornikkut sunniutissai**

Siunnersuut innuttaasunut allaffissornikkut sunniuteqanngilaq.

## **7. Naalagaaffeqatigiinnermut Namminersorlutilu Oqartussanut tunngasut**

Siunnersuut Naalagaaffeqatigiinnermut nunattalu tunngaviusumik inatsisitigut inissisimaneranut sunniuteqanngilaq.

## **8. Oqartussaasunik kattuffinnillu tusarniaaneq**

Siunnersuut tusarniaassutigineqanngilaq. Siunnersuut Namminersorlutik Oqartussani naalakkersuisoqarfiit attuumassuteqartut isumasiorlugit suliarineqarpoq, soorlutaaq kommunit tamatuminnga ilisimatinneqareersut.

### **Siunnersummi aalajangersakkanut ataasiakkaanut oqaaseqaatit**

#### *§ 1-imut*

Imm. 1-imut.

Inatsisartut 2025-mut aningaasanut inatsisaata qaammatisiutit malillugit ukioq akileraarfiusoq sioqqullugu kingusinnerpaamik 22. november akuersissutigineqarnissaa siunnersuutigineqarpoq. Taamaaliornikkut Inatsisartut Naalakkersuisullu pillugit Inatsisartut inatsisaanni § 15, imm. 1-imi piffissaliussaq atuuttoq (15. november) avaqqunneqassaaq.

Imm. 2-mut

2025-mut nuna tamakkerlugu akileraarutip qaammatisiutit malillugit ukioq akileraarfiusoq sioqqullugu kingusinnerpaamik 22. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 61-ip, imm. 2-mi, piffissaliussaq atuuttoq (15. november) avaqqunneqassaaq.

Imm. 3-mut

2025-mut nuna tamakkerlugu immikkut akileraarutip qaammatisiutit malillugit ukioq akileraarfiusoq sioqqullugu kingusinnerpaamik 22. november akuersissutigineqarnissaa siunnersuutigineqarpoq. Taamaaliornikkut Aningaasarsianit akileraarutit pillugit Inatsisartut inatsisaanni § 64-ip, imm. 2-mi, piffissaliussaq atuuttoq (15. november) avaqqunneqassaaq.

*§ 2-mut*

Inatsisip tamanut nalunaarutigineqarnerata aqaguani atuutilernissaa, ullorlu 1. januar 2025-mi  
atorunnaarnissaa siunnersuutigineqarpoq.